

四庫全書

集部

欽定四庫全書

集部

欽定本朝四書文卷九

詳校官檢討臣朱依炁

主事銜臣徐以坤覆勘

總校官原任中允臣王燕緒

校對官典簿臣郭祚熾

謄錄監生臣鄧友樗

欽定四庫全書

欽定本朝四書文卷九目錄

中庸下

凡為天下國家有九經 三節

蔡世遠

凡為天下國家有九經 一節

徐春溶 墨

凡為天下國家有九經 一節

陸龍其 墨

敬大臣則不眩 則財用足

李光地

敬大臣則不眩

吳學顥

懷諸侯則天下畏之

熊伯龍

程

懷諸侯則天下畏之

曾王孫

墨

尊其位

三句

熊伯龍

忠信重祿

四句

張玉書

墨

忠信重祿

二句

熊伯龍

程

言前定

四句

廖騰奎

改程

誠則明矣

二句

方舟

能盡其性

六句

金居敬

見乎著龜

二句

邵基

見乎著龜

劉巖

誠者自成也

一節

趙景行

墨

誠者非自成已而已也

一節

雲中官

墨

今夫山

二段

汪士鋐

考諸三王而不繆

二句

汪琬

墨

仲尼祖述堯舜

一章

金居敬

仲尼祖述堯舜

一節

張英

墨

唯天下至聖一節

汪份

舟車所至

八句

陶元淳

墨

淡而不厭可與入德矣

蔡世遠

上天之載

三句

徐用錫

凡爲天下國家有九經

三節 蔡世遠

政有可久而可大者盡其事而可舉矣夫謂之經則可
久行之而效則可大公欲爲天下國家亦盡其事以舉
之可耳今夫爲治者必先定其規模而後從事焉規模
不定則不能由內以及外由親以及疎由近以及遠而
天下國家之故舉足以紛我矣又何以徐及其效而實
致其功哉臣嘗因方策之中遙想夫文武之政君勵精
於上臣工効能於下大綱舉小目張天下率其化而沐

其休臣於是知天下國家之治蓋有九經也經首修身而尊賢親親固將以修吾身也至於大臣與羣臣則亦推尊賢之心以敬之體之而已庶民百工遠人諸侯則亦推親親之心以予之來之柔之懷之而已臣於是知天下國家不難治也欲以建民極則修身也欲以決是非則尊賢也欲以敦一本睦九族則親親也凡天下國家之可尊者莫不有以尊之則大臣獻其謀小臣竭其忠矣凡天下國家之可親者莫不有以親之則農工商

賈各執其業四方向風諸侯賓服矣文武之世成周之
盛本一人懋修之德行寬仁敦大之政以推恩臣民又
安海內率是道也自非然者內外不飭動越規矩非所
以修身也遠君子近小人聲色貨利日接於目非所以
勸賢也刻薄猜嫌失諸父昆弟之心非所以親親也而
且朝廷之上無禮賢下士之誠又無膏澤恩施之布大
臣叢脞為憂百官持祿保位供億輸將民不堪命興役
煩多工無寧日遠人無向往之心諸侯有背叛之志

而天下國家愈難治矣不盡其事而欲收其效雖文武之聖不能故曰必先定其規模而後從事也

一氣輸灌中條分縷析井然不亂非深於古文法律者不能有此

凡爲天下國家有九經

一節 徐春溶墨

詳爲治之目於經舉之固存乎其人矣蓋經之目雖有九然非虛列九者之名而遂可以爲天下國家也舉之不在其人乎述以進君若曰人主撫有祖宗之成業而欲綱紀庶務綜攬治畧其道法蓋昭然明備矣然而有爲之主天資既已明敏一二輔亮之臣進說於君必以爲道貴通變事在宜今法先王之治者師其大意之所存而已其節目繁委之數不必屑屑相拘也不知其非

然也以臣言之聖人立天下之大法其由內及外由近及遠者皆原本學問之功而非雜以智術刑名之數王者經天地之大業有一人必治以一法勅一事必本以一理者又皆詒翼子孫之計而非僅為苟且旦夕之謀是故文武之政皆其為天下國家者也豈必僅為文武當日之天下國家亦為凡為天下國家者也其為之者不有九經乎以九經之目屬於為政者一人之眇躬則繁矣然而以宮府朝野之數相稽則聖人預知吾之經

極天下之至賾而不可厭以九者之目列於天下國家
紛紜之衆區則又畧矣然而以君臣上下之心相考則
聖人又知吾之經舉天下之至要而不可遺臣為條其
目則曰修身也夫身之不可不修臣已畧言之矣而九
經之首重者固不外是也豈非當日之止緝熙而迪敬
義者必由是道而後人之昭義問而念祖德者亦不可
不由是道與次則曰尊賢也親親也賢身之輔也親身
之本也乃賢次於身而親次於賢者意即臣事親不可

不知人之說歟次曰敬大臣也體羣臣也大臣身之貳也羣臣身之支也乃敬則尊而體則親矣其亦猶臣尊賢之等之說歟次曰子庶民也來百工也庶民之係於天下國家厥惟其本矣百工則民之餘也而民至此乃及工又繼民而及者由親親而後仁民子則親之推也由農時而後及冬官工又民之推也次曰柔遠人也終之曰懷諸侯也遠人之昭君德厥惟其廣矣諸侯則與分治天下國家者也然經以是終焉者內治修而後及

外且兄弟甥舅之國亦親賢之列而皇華賓客之使亦敬體之遺也蓋其見之經者如此由是思之先王之建是經也非僅飾太平之具也將使後世英主可以神明吾意而中才亦可循是而寡過蓋是皆達道達德之理流布於千百年之上下爾後人之舉是經也非僅以彰率祖之名也乃賢智既以狹小前人之制而守文之主又徒存文具而無精意以相取夫豈識人存政舉之功盡備於皇極綱紀之內哉君欲行之蓋有其效與事在

矣

蒼茫雄渾無意取悅時目而文歸典則

原評

此作濶達不羈陸作謹守繩尺學者統觀而有得焉
可以識文之變矣

凡爲天下國家有九經

一節

陸龍其

墨

聖人告君以為政之經列其目而可勉矣夫九經皆定於文武政莫詳於此也悉舉其目而有天下國家者可不知務乎夫子以為政之定於文武者非徒一代之成法而古今之治道莫能易焉故行於當時則為政而傳於後世則為經其本在身而其用達乎天下國家方策所布固昭然也達道達德臣既為修身備言之矣則請進而詳其經焉盖凡為天下國家其教令所施因時而

易者固不可執一成之法而不知變而綱紀所在不因時而易者則不可無一定之經以立其則文武蓋慮之深矣故熟察乎天下國家所不容數者而定之為經因詳審乎天下國家所不容畧者而列之為九謂夫經之本必在乎身也則首列其目曰修身身立乎天下國家之上而觀瞻者恒於斯則修必處乎天下國家之先而強勉者恒於斯而賢者身所由修也則尊之要焉未有好修之主而不藉乎師保之尊嚴者也親者家所由齊

也則親之要焉未有立政之朝而不講於九族之敦睦者也至於大臣羣臣則立乎朝廷之上而內之為一國之倡外之為天下之望者也敬焉體焉而所謂正身以正朝廷者在是矣庶民百工則又處乎一國而天下之視聽係焉者也子焉來焉而所謂正百官以正萬民者在是矣遠人諸侯則又散於天下而國之安危係焉者也柔焉懷焉而所謂正萬民以正四方者在是矣自其始乎身者言之則遠近之儀型視乎一人之勤怠而修

之固不可不嚴自其達乎天下國家者言之則內外之網維亦視乎一人之張弛而行之俱不可不力以此施之一時則一時之政由此舉經之所以為可大以此施之百世則百世之政由此舉經之所以為可久君何不勉焉

準平繩直規圓矩方先正風格於茲未墜 所不及
先正者氣骨之雄勁耳一種優柔平中之氣望而知
為端人正士

敬大臣則不眩

則財用足

李光地

政行於朝野可以觀其效矣蓋大臣小臣在朝而相維者也庶民百工在野而相資者也欲使朝無廢職而野無廢事非政之行也可庶幾乎意謂人君以修身為本而篤於親賢以為輔則必有賢之等者焉而將以收其勵翼之勲也則必有親之推者焉而將以成其樂利之治也是故於大臣不有以敬之則心志疑而聽聞雜吾見其眩而已矣冢宰掌宮中之政而左右不得售其欺

六卿持邦國之綱而遠近無不通其隱能使吾君之心
洞然者非敬大臣之效乎於羣臣不有以體之則分誼
薄而忠愛微吾知其報禮也輕矣有棧樸之育養故作
其疏附奔走之勤有鹿鳴之恩施故發其皇華四牡之
志能使多士之義殷然者非體羣臣之效乎無以子庶
民則民心離而邦本搖而欲有人有土也難果其子之
也出事南畝則駿發乎爾私入執宮功則盡勞於君上
蓋在公在私無不勸也則子庶民之效也無以來百工

則器用缺而本業困欲其有財有用也難果其來之也
天生五材而咸用之凡備物以利民者周國有六職而
居一焉凡執技以事者恪蓋在官在民無不足也則來
百工之效也正朝廷以正百官正百官以正萬民由是
萬民正而遠近莫不一於正者王政之行豈非旋至而
立有效者乎

用經籍典切該括處似化治間先正而氣質更為光
潤完美乃作者功力獨到處

敬大臣則不眩

吳學顥

知所以敬大臣治道達矣夫大臣能盡其職而萬事理
敬之亦何事不達哉故不眩有斷然者且國家設庶司
以共理天下事其是非可否之機待命於大臣此固不
責其力而責其心者也惟人主先盡心於大臣而後大
臣能盡心天下事以盡心於人主此九經所以有敬大
臣之效也夫隆其名曰大臣非為養望也實將以參乎
密勿者為一人勵翼之資抑專其責曰大臣非為具官

也亦將以殫其猷為者總百僚紀綱之重故大臣之聰明人主之聰明也大臣之聞見人主之聞見也敬之而不眩所可必已人主以形迹待大臣大臣引分自嫌事至而持兩可名實所以清也敬之者一德一心體貌非以為文而大臣亦得坦然自信竭其夙夜之忱焉國有大政而祖宗典故時事機宜有秩然不亂者君亦可安坐斷之矣人主以吏事責大臣大臣奉法避過事至而不敢承百務所以擾也敬之者為馮為翼心膂實隆厥

任而大臣亦得從容自展抒其帷幄之謀焉國有重務
利害決於崇朝而不搖國是守於一定而不變其釐然
有章者君亦可無事處之矣夫變理則問三公耳目則
任左右自謂操駕馭之術不知大臣者可使畏一人之
靈輿不可使畏衆多之議論也文武之世常以明白正
大之情堅股肱一體之戴即執御前後有不得聞其聰
明之用者所以委任專而成一代之訏謨惟此敬也哉
抑錫予則崇虛名臨事則矜獨斷自謂防偏任之憂不

知大臣者可責其虛公之度不可啟以迎合之端也文
武之世恒以謙抑下濟之衷受予違汝弼之義即深宮
燕處無在非誠意之孚者所以聽信殷而翼一人之聰
睿惟此敬也哉人君宜知所勉矣

語能該括氣亦充沛筆力精神頗與熊次侯為近

懷諸侯則天下畏之

熊伯龍

程

知所以畏天下則建侯非失矣甚矣天下相服以德也
懷諸侯者不期畏而畏至豈非盛世之事乎對哀公曰
先王散天下之大柄即先王威天下之至計臣於經所
云懷諸侯者知之文武之興由藩侯不制天下之命則
我之為天下與為國家也何以異天下之勢在封建不
獲友邦之心則天下之視共主與視列辟也何以異是
故懷諸侯非施德於不報也天下所以畏之者恃此道

也明德懿親天下皆知其有家人之義而又不惜布惠推心大發其天地生成之感爾日之諸侯其繡壤相錯者一如伯叔甥舅之聚族處也而磐石之宗不可動搖矣建賢作輔天下皆知其有君臣之情而重之以寬仁大度深動其子孫臣庶之思爾日之諸侯其徂維求定者一如百官庶尹之指臂使也而羣扶之主倍有神靈矣如是則王臣王土諸侯所得而治者天子皆得而治之修身立政之朝天下已不敢菲薄綱紀而况謹度求

章有以塞違心於未兆也哉如是則來享來王諸侯所不得而及者天子亦得而及之柔遠能邇之世天下已不敢輕量朝廷而况彤弓旅矢有以揚淑問於疆外也哉蓋法立知恩原非以忠厚開末大之漸故德威惟畏亦不假刻深為震疊之謀古天子諸侯相與之際仁至義盡有如此者

雄深雅健筆力氣象足以涵蓋一世

原評

鎔經液史聲光炯然

懷諸侯則天下畏之

曾王孫墨

效著於天下者有實致其懷者也蓋天下不易言畏也而懷諸侯者有以致之其效不可觀乎且先王以一人撫四海之內而天下向風兢兢懼無以奉一人之法者豈有他哉相天下勢之所在而急圖之而天下遂不得不合其勢以歸我乃後世不見政之強而見勢之弱遂以弱勢議先王而忘其強政是未明於懷諸侯之效也夫諸侯亦唯是伯叔甥舅奉天子令以守天下耳懷與

不懷似無異數也然天下有時不服天子之令而服諸侯之令則諸侯何可不重慮也諸侯亦唯是禮樂征伐稟天子威以致天下耳懷與不懷似無他適也然天下有時不凜侯國之威而即不凜天朝之威則諸侯何可不重念也故諸侯當懷也懷諸侯則天下畏之矣天下之大勢在民先王慮民之不得其所也立諸侯以撫之迨其後也各私其民而民亦各暱其君見一惠焉曰吾君之德也見一刑焉曰吾君之威也而諸侯之勢成矣

懷之而諸侯肅然稟其政教焉民將曰吾君如此其何
敢不共民之所往威莫大焉而非懷之不至此天下之
大勢又在小侯先王慮小侯之或侵陵也建方伯以衛
之迨其後也漸劫以威而小侯亦服於其令或有患焉
曰彼能庇我也或有違焉曰彼能制我也而諸侯之志
攜矣懷之而諸侯皇然進於軌物焉小侯亦將曰彼尚
如此又何有貳心小侯之所歸勢莫隆焉而非懷之不
至此或謂此在有天下者行之而效未有天下而行之

而未必效者非也盟主之德威日著即遠裔無不求成
此在假力猶然而況乎王道之作乎也昔我先王虞芮
質成而有二之勢已集於歧右降至周召分治而成夾
輔之勲桓文迭霸而奏匡合之烈孰非懷畏之明驗也
哉或謂開創之天下得之而效守府之天下得之而未
必效者亦非也朝廷之舉措得宜即強藩無不聽命此
在衰亂猶然而況乎周禮之盡在也昔我武王封建未
集而負宸之朝大定於沖人降至車攻奮興復著會同

之盛東都侵弱不失晉鄭之依又孰非懷畏之遺模也哉而其事乃可得而言矣

只講得諸侯與天下相關處多耳懷字中義理却未洗發得出所以不見三代以上協和撫綏氣象然其筆勢雄橫議論翻騰可以增人才思

欽定四庫全書

卷九

尊其位

三句

熊伯龍

敦本之事三舉之而備也蓋非位與祿豈能安其外非
好惡與同豈能安其內近古之事亦聞此乎昔周之封
君蓋八百矣而同姓之國且至五十先王於本支之間
何嘗不衆建而少其力哉雖然衆建而未嘗以衆人遇
之少力而未嘗以少恩處之所由與後世異也一曰尊
其位一曰重其祿一曰同其好惡問先王之世有冢君
失南面之尊支子列齊民之數者乎曰無有也弱弟之

戲遂封桐也夏與商未之聞也介弟之貴且分陝也夏與商未之聞也他若滕子未微援宗盟而長外侯蔡胡世辟釋嚴罰而復舊土亦惟天家為永念焉公今日者雖還龍旂於故府謝河海於鄰封而驚冕信圭居高無恙誰之賜哉問先王之世有覲頒鮮朝宿之授峙耜靳湯沐之頒者乎曰無有也錫田曰大啟宗邦之報功不敢不過也分土曰惟三庶邦之展愛亦不敢不及也若夫晉之有陽樊也王甸可以錫康侯鄭之有祊田也懿

親莫重乎母弟其在中主罔敢愛上錯焉考之周禮雖
山澤所及掌於王人侯國祿餘待用天子而提封采甸
口不言貧豈不優哉問先王之世有流言而相閱於牆
呼伯而靡所與同者乎曰無有也正則為肥牡為醴酒
我可為諸父昆弟談笑而道之也變則為斧斨為零雨
我可為諸父昆弟垂涕泣而道之也是以王有愼則賜
之弓矢此推而同之之義國有故則上告天子此引而
同之之義亦祈大宗小宗咸有一德焉嗟乎六衣之請

也私室好之公室惡之諸姬之盡也異姓好之同姓惡之有王者作除異族之逼處布方伯以腹心召好去惡翼戴天室豈有此患哉

隸事太多恒恐傷氣此偏動宕有神致無填綴之累

排比之迹

原評

取材博而運以雄峭之筆較同時諸家獨為雅馴

忠信重祿

四句

張玉書墨

勸有得乎士民者其所以體之子之者至矣蓋君之子
士不可不厚而取民不可過嚴也行政者尚思所以勸
哉且國有與立大臣而外士民其先焉是故三百六十
臣之身家君統之矣自君任之優之而臣乃克有其身
家也生成之感在君不在士也億人兆人民之身家君
用之矣自君愛之惜之而民乃克全其身家也寬恤之
戴在君不在民也如經言體羣臣凡以羣臣固士也敬

慎而辭友朋每幸吾君可共功名矣特以小臣新進退而不敢有所言進而不敢有所為此時望吾君推誠之心倍深於望澤至於德足食君子之餽而大君有衆人畜我之思士於其時實撫躬而嗟悼之一日者忠信以將之君有心布諸其臣重祿以賚之臣有身謀諸其君舉居恒太息之聲有并不敢告諸僚友者不意我后聖明已取諸其懷而惻然也竭百爾股肱之心以答予一人之忱竭百爾股肱之力以答予一人之澤我知立子

孫之朝猶有感泣祖宗之德者豈非所以勸士者得哉
經言子庶民凡以庶民固吾百姓也竭蹶而奉公家誠
知小民宜愛君王矣特以草野疎賤朝耕天子之田暮
入司空之籍此時自愛其力之心倍深於愛主至竭舉
趾滌場之力僅以償車服玩好之供民於其時實傷心
而隱痛之一日者使必以時焉君無逸也為民慮其勞
斂必以薄焉君不貧也為民思其富舉斂斂無告之懷
有并不敢形諸嗟歎者不意君恩高厚已憫其艱而惻

然也頌豈弟者赴周官之令媚君王者獻公子之裳我知非惟正之供亦有樂效子來之命者豈非所以勸百姓者得哉君之廷有士君之野有民也臣願君取方策而圖之

每段各有兩意用反用正易落排偶此文散行處多平列處少故但覺靈氣盤旋而題中情事已寫得十

分警動

原評

纏綿愷惻之思運以雋筆達以雅辭故無一語甜俗

忠信重祿

二句

熊伯龍墨

徵勸士之實而仁義行乎其間矣蓋忠信所以明義重祿所以明仁勸士者寧外取人之道而致之乎對公若曰人主將致非常之士而必待非常之舉未見士之為王前也人情莫不相避於偽而又欲自厭其心誠使君有情羣斟酌之臣有心吾敬答之非常之報亦往往而收焉經言體羣臣凡以羣臣固士也無公孤之貴則君王之色擬於帝天恩威叵測非所期也亦播以朝廷之

至意而已從田間而來則宣力之暇亦念身家國典而外不敢干也亦予以臣子之厚實而已然則忠信重祿曷可已哉以父母之身千里而事人其心易為天子之所疑若曰彼特為祿來也而以槩天下之士則大不可今日者有大利則喜形於色有大害則憂形於色至誠惻怛無不為予大夫取諸懷也夫忠者人臣之道則然而顧已得之於其君是忘乎其君者也忘乎其君何君也哉而忍負之以父母之身千里而事人其心當為天

子之所悲若曰彼實不為祿來而又不得不為祿來也即古之稱良臣者何獨不然今日者逮其下婦子寧焉逮其上祭器守焉匏豕山桑波及臣家者皆君餘也夫祿者人臣之所應爾而此若獨得之於其君是全乎其君者也全乎其君何君也哉而忍負之是以衰世之政君非必鬼神臣非不安飽然任左右則易而任工僚則難養廉節則難而逭官貪則易所用非所需也故人有服政之苦而無以動其天地生成之感先王之世官不棄

賢者亦不棄小人然弘無欺之度以處無欲之君子沛
有位之恩以謝有欲之駿雄所用皆所養也故人知事
君之樂而合以效其腹心奔走之材由此言之推小雅
樂心之旨稽周官馭富之隆將無望於後人哉

語語即乎心中乎事理後二股所見雖淺而議論
實有根據 次句竟未點出自是疎處

言前定

四句

廖騰奎改程

歷言前定之效而知不可不豫也蓋觀言事行道之所
由得而不能前定者可知矣若之何不求所以豫也且
吾言凡事貴於豫者蓋人以無定之中任事物之所值
而遷徙以從之則自一身以及百動從後而悔之者常
不可勝舉矣而焉能有立而無廢哉即如一言也樸訥
者將言而囁嚅敏給者亦有時而流遁蓋每患乎其跲
也乃吾人之言非以析事即以明理苟實見夫此事此

理之源流則未言而所以為言者已前定矣雖當機之引伸觸類亦不必營度於未言之先而自可從容以暢吾旨故有堅強之辨自謂人莫能難而無端見蹟而君子則反覆而必伸蓋言之理已豫也即如一事也才分既各有其優絀而時勢又互叅其險夷蓋嘗患其困也乃天下之事經則有宜變則有權苟實見其為經為權之旨要則未事而所以為事者已前定矣雖臨境之變化屈伸亦不能逆料於方事之頃而自可堅貞以遂所

圖故有敏達之才自謂肆應咸宜而動輒得咎而君子
則坦行而無畏蓋事之理已豫也至於行則言與事之
總也言與事皆卒發於一時而行則要之必世言與事
之病皆外見而行之病則返而自苦其心久矣夫疾之
難免也而惟不能前定故至此苟深求夫行之大本則
原於性情者有其自然而達於倫物者有其當然朝夕
以循之而無有越畔之思所為惡於己志者無由而伏
也則行之本已豫也至於道則言事行之所歸也言事

行皆因時以起義而道則其所從生言事行之失可旋
更而道之失則任所發而皆悖甚矣夫窮之多途也而
亦惟不能前定故至此苟深求夫道之大原則會為一
本者已燦然條理之畢具而散為萬殊者仍渾然本體
之可窺左右以取之而皆有逢原之適所為四達不悖
者在在可恃也則道之原已豫也夫言事行道皆非可
膠於一定者也而其本則有可前定者亦曰誠而已矣
非誠之求而執其私意以為前定亦見其敗矣凡事何

以立哉

各段洗發無一蒙語弱筆不疲不窮二段更難得如此了當

誠則明矣

二句

方舟

觀誠明之同歸而知人道之可恃也蓋君子無慕乎誠之必明而深恃乎明之必誠以為人道於是乎立矣且性與教之分特言其初之所從入者耳其終則未有不合者也蓋反諸身而為誠歷於道而為明其量固有所止而其用亦實相須則夫遲速先後之間所爭正自無多耳天下之物苟非人之所固有而懸測之則見以為然而終不能信其然有一固有而熟習之者而其情形

不待辨而白矣誠之無不明豈有異於是乎仁與義充於心則事父事君之道曲折詳盡而不至於有所遺性與命未嘗漓則萬事萬物之形高下參差而皆有以識其分蓋動於心之莫解則其見必真而得其理所從生則其用不敝也世固有渾然無偽而貿然無知者然彼無怪其不明其所為誠者固非誠也誠則無事求明而已操乎物之所不能遁矣凡物之情苟非己之所真知而強赴之則心欲如是而心亦不能必其如是一深

知而篤信之者而其意向確乎不可移矣明之可以至
於誠豈有異於是乎深知夫吾身之離道而非人則俯
仰上下之間不敢自恕而必求既乎其實深知夫吾性
之有善而無惡則隱微幽獨之際不忍自欺而久將懣
乎其心蓋苟且之意既除則其力隨在而可據二三之
見既絕則其情萬變而不渝也世固有論則善之而行
則背之者然是無怪其不誠其所為明者固非明也明
則未能遽誠而匿於心者已無偽矣是故成於性者有

異人之誠而無異人之明無異人之明則其誠亦未為絕矣成於教者不患其誠之不至而第患其明之不至明之量果無所虧則誠之事已過其半矣此人道所以繼天也

兩則字精神俱從實理勘透無一字可移置上二句理醇氣樸筆力復健

能盡其性

六句

金居敬

極盡性之量而至誠有功於天地矣夫人物天地其理一而分則殊耳已性盡而人物之性皆盡至誠之為功於化育豈不然哉今夫聖人之心即天地之心而有生之體皆天地之體也惟盡性以至命者有以得其會通而修道以立教斯中和位育更無待於推致而後然耳吾觀夫天地之生人生物化之育之一誠而已矣羣黎得之以正其君臣父子之屬而篤其親遜庶彙得之以

容其飛潛動植之類而至其繁蕪舉夫故者化之使新
若有變通鼓舞之術無者育之使有顯其知始作成之
功而要歸於天下之至易至簡者也而至誠者既有以
得其全而立之極矣則是仰觀俯察無有以隘其濬哲
文明之質而知之無所不達上蟠下際無不可以施其
徇齊敦敏之材而行之無所不順也以言乎人之性豈
得與其性同科哉然而誘迪焉以啟其蔽扶進焉以立
其懦雖使仁智者見於一偏顓蒙者滯於日用而至誠

之造就督率之者無不至也則人性之為至誠所造就
督率者亦無不盡也以言乎物之性又豈得與人之性
相比哉然而因其力者又有以制其力養其材者又有
以取其材雖鷙暴者終不可以擾狎隕落者更不可以
敷榮而至誠之茂對曲成之者無不至也則物性之為
至誠所茂對曲成者亦無不盡也若是則人也物也天
地生之而至誠成之則謂至誠之化之育之也夫誰曰
不可而化育則仍歸之天地贊化育則歸之至誠者何

也蓋其理則一也至誠即有為之天地非天地不能有
為天地即無為之至誠非至誠不能無為也一化一育
有與為不違有與為奉若固無彼此之間矣其分則殊
也天地之所為雖至誠亦有所不能預至誠之所為雖
天地亦有所不能及也化之育之罔或弗裁成罔或弗
輔相實惟左右以之矣所以中和位育之君子必使無
一夫之不獲無一物之失所至於四序五行之無偶失
其常而後乃安也若猶未也加戒慎焉惟至誠之盡性

則有其自然者此豈直贊之而已哉

實義搜剔得玲瓏舊義洗滌得新穎以觀理無纖翳也

見乎著龜

二句

邵基

實理之所形在物與身者可驗也夫誠之理未嘗一日
息也即著龜四體而幾之微者著矣今夫宇宙之內謂
之太虛而實非也氣之所聚而於穆之命凝焉形之所
成而人事之數應焉司其柄者鼓舞以盡神效其能者
顯奇而洩秘蓋實有不能自己者焉彼興亡之機之先
見者吾得於著龜驗之方夫數之未定著龜未有其兆
也及夫用動用靜而吉凶判矣此著龜之見也而著龜

豈無故而見也乎正元會合之運實有醞釀於天人之
交者於是神物不能秘其瑞也陰陽駁雜之氣實有交
勝於造化之際者於是象數為之兆其違也苟非理之
實徵其盛將有疑其近於諛者矣何以數十世之寢昌
皆在燭照之下及事後思之而不爽也苟非理之實徵
其衰將有疑其近於誕者矣何以百餘年之敗壞如在
數計之內及事後覺之而已晚也蓋誠體物而不遺而
著龜即乘是以發機緘之妙理之因數以顯者在此矣

吾更以四體徵之方夫事之未接四體未呈其機也及夫周旋折旋而得失分矣此四體之動也而四體豈泛然以動也乎皇降民秉之彛附麗於身者已固於是一俯仰而悉協其則也仁義中正之極托根於心者漸虛於是一屈伸而盡違其天也苟非帝鑒之所憑將中節焉而未即為得何以清明在躬之日即欲昏潰出之而不能也苟非天命之所在將矜慎焉而可以無過何以致衰兆亂之頃即欲勉強持之而不得也蓋誠為物之

終始而四體即因是以昭合散之能理之因形以著者在是矣而誰則知其見與動之微也哉洵非至誠不足以知幾矣

理醇正而氣疎達是極意學正嘉先輩之文變化舒卷處或有未逮穩當老成已近似之矣

見乎蓍龜

劉 巖

幾見乎物誠而形也夫天下事既見而後知則非前知
矣蓍龜乃幾之先見者知之者誰哉且寂然不動者誠
也動而未形者幾也幾在有無之際問焉以言而受命
如嚮者莫甚乎蓍龜然而知幾者鮮矣夫筮人辨九筮
之名而詳分掛揲奇之法龜人掌六龜之屬而眡上下
左右之文蓋志定於先必以官占而斷稽疑之用尤以
鬼謀為徵是故蓍有卦焉卦有占焉占有繇焉龜有體

焉體有兆焉兆有頌焉此百姓可以與能而吾獨謂知
幾者鮮何也夫無聲無臭者上天之載而維皇之意使
吉凶常萌動以示人沖漠無朕者於穆之真而神物之
興則幽贊於神明而立命所以天地間理為之綱而氣
以具形上以形下者而凝氣為之運而數以生無形以
有形者而定上春而相簪也上春而釁龜也蓋皆以歲
首而聚生物之氣焉夫塊然充塞乎兩間者無非氣也
而氣之為休為咎常於物之至靈者見之則著龜之氣

之所觸發即天神地祇之精英也著以陰陽而其本則二也龜以五行而其本則五也蓋皆本乾坤而成變化之數焉夫自然推行乎古今者無非數也而數之或從或逆常於物之至變者見之則著龜之數之所燦陳即二氣五行所發著也夫氣與數相合無間而理存乎其理與氣數莫測其端而命行乎其際惟天命真實無妄而著龜洩其朕兆以紹天之明惟鬼神體物不遺而著龜乘其氣機以前民之用是則非著龜占事以知來

固不足以開物而成務然非齋戒以神明其德必不足以極深而研幾蓋幾微故幽非誠精故明者不能感而遂通天下之故也苟徒以前知為術數之能則一大人占之有餘智矣而何貴乎至誠之道哉

此章章首二句言道自可以前知國家將興六句則指理之先見者所謂幾也善必先知以下乃言惟至誠能知之實耳是見乎動乎單就幾動於彼而言不得預侵至誠知之地步唐荆川二句題文到結處方

起下至誠前知可証此文就著龜上實發見乎之理
精當不減前人獨前半預透知字為侵下耳

金安巴圖魯全書

卷九

誠者自成也

一節

趙景行

墨

中庸因誠以及道原乎天而盡於人焉蓋惟有誠而後
有道亦惟自成而自道者莫可諉也誠之於人何如哉
且天下一誠之所際也苟不知誠為皆備之理無由知
道為當行之事乃或以後起者之多所謝轉疑最初者
之多所遺惡知自天之人之際有其本然乃以有其當
然者乎吾與天下言誠矣蓋所謂誠者無妄之原天地
以之立心者羣生即以之立命俯仰上下之間即虛無

之地亦且本是以充周而況其為形生者歟無偽之宰
鬼神以之為德而不可掩者萬類即以之為體而不可
遺曠觀飛躍之機即無知之倫亦必資之以各正而況
其為有覺者歟蓋所以自成也此其無為者也而有為
者事即由之而漸起亦其無待者也而有待者責即於
是而有歸夫然而道又可得言矣自其發於心者而言
之喜怒哀樂皆有必不容已之情而節必求其中非假
諸他人之懷也雖裁成輔相功在兩間而專而察之總

不敢諉為中和以外之事自其成於身者而言之子臣弟友皆有必不可辭之分而道務期其盡又非托諸他人之業也雖禮明樂備貫乎幽明而返而求之總不敢謝為仁孝不及之端明其為自道而人又安得自外於道以自歉於誠哉以原乎天者觀本成之量而即以盡人者著求誠之功誠固如是其甚切也夫

自道句易作沉著語自成句往往無把鼻矣虛無之地無知之倫四語最是道得周密嘉隆盛時場屋文

字乃見此等有根抵語原評

誠者非自成已而已也

一節 雲中官

墨

成已者必及乎物原諸性而知其故焉夫已與物均此一誠則仁知之德固無分内外者也安有施之不宜者哉且自物與無妄而凡天下之生而具之者本無有盈歉之分也物與我俱生而所以待命於我者已具於有生之初則我與物俱成而所以為物立命者亦豈有加於天命之始乎不過即吾所固有者舉而加之而固已無餘事矣如君子而既有誠之之功則於自成之體既

已不虧而所以自道其道者亦已無憾矣顧吾之理既
統乎天下之物以為誠則吾之功亦必統乎天下之物
以為自成吾以誠自成而天下猶有物焉遺於吾誠之
外此非誠之尚有遺物也而即吾之所以自成者有不
全也吾以自成者自道而天下猶有物焉棄於吾道之
外此非物之不統於道也而即吾之所以自成而自道
者有所缺也故誠者非自成已而已也所以成物也奚
以明其然耶蓋天之所為公乎物而不妄者誠也而人

之所以具於心而各正者性也誠之理由合而見為分而仁體事而皆在知周物而不遺皆誠中自足之體自裕之用而已與物因有各見之功能性之德雖分而本無不合而心無私者必能大曲成之量心有覺者必能全無我之真皆性之德所以百慮而一致同條而共貫而成已與成物初無歧出之性量如是則安得有內外之別也乎蓋惟其得於已者仁即誠之通知即誠之復而於繼善之原既無所歉故其見於事者時乎措諸已

而體仁者自具夫長人之元時乎措諸物而知臨者悉
原諸觀理之哲而於叅贊之業自無不周於此知己外
無物而成不獨成宜則皆宜者洵非外至而強為之也
其故不亦曉然也哉人誠能全此誠於己固無憂道之
不及於物也

數層曲折一氣貫注不散不雜理脈俱清 古文大
家非資材絕人者莫能問津中人初學求為清真妥
當以此等文為權輿可也

今夫山

二段

汪士鋐

觀山水之生物愈以見天地之盛矣夫山水為天地所
生而其生物之廣大不測如此天地之盛何如耶且夫
天地之氣結而為山融而為水山水固天地所生之物
也乃山水得天地之氣以生而復能生物於天地之間
以大天地之功用吾觀四海九州生者一天成者一地
何以彼此物產之美各傲人以所無而必不能強同蓋
天地固以山水隔其東西限其南北而山水之氣遂各

有所鍾於物焉故欲觀天地之生物者宜觀之山水殊
方異域仰焉此天俯焉此地何以彼此風土所有苟易
地以相處而皆弗能為良蓋天地固以山水異其寒煖
殊其燥濕而山水之性遂各有所偏於物焉故能窮山
水之生物者可以知天地吾始觀乎山之一節卷石誰
謂非山吾始觀於水之一端一勺誰謂非水雖然此未
觀山之廣大與水之不測也蓋嘗總山水之所生者論
之其為生民所取資歟生之誠是也乃若其質陋劣而

無益於人其性狼戾而有害於物在世安所取乎是而亦儲陰陽之精以生之何疾與污之無所不藏納也其為日用之常物歟生之誠是也乃若玩好之足以蕩人耳目珍奇之適以溺人心思在聖人方深惡乎此而反積英華之氣以生之何美與惡之無所於決擇也而不知此正山之所以為廣大水之所以為不測也是故極物之怪偉奇特而或終為人之所羅而致之焉非人之智也而實山水之足供人世之求也竭人之聰明才

力而或於物竟有不能取者焉非人之愚也而實山水之難以人力相窮也則試觀草木禽獸與夫寶藏之屬於山黿鼉蛟龍魚鼈與夫貨財之屬於水而豈徒曰卷石已乎一勺已乎嗚呼此天地之所以為盛也

題甚堆垛能以議論運掉不落龐雜自是能者

考諸三王而不繆

二句

汪琬墨

觀道於考建其盡善有明驗矣夫三王天地皆前君子而備道者也不繆不悖有一之未善者哉且王者以身立創制之極則古今上下胥聽治焉變通於百年者宜今即所以法古變理於一日者下應亦所以上符紀綱既著有不遠為承而躬為配哉本身徵民未盡君子之道也道莫盛於古今而三王獨居其備文物典章之具君子所奉身以思紹者也考其勢可以觀變通考其

時可以參因草考其心可以溯神明故規模弘遠遵三王所已為者不嫌拘肇三王所不及為者不嫌創以新猷而追曩烈夏有書商有誥周有官如見君子之協禮焉夫何繆盖有道而後有三王有三王而後有君子其身為三王所式憑之身其民亦三王所共治之民也用三王之兢業以持身即用三王之典則以宜民道在而俱囿於君子之規矚矣迄於今文獻猶可問也豈有顯戾其章程者哉道莫昭於上下而天地獨統其全高卑

健順之能君子所側身以求合者也建在形有與為觀
察建在事有與為調變建在理有與為感通故法象昭
明守天地所已備者不妨同補天地所不及備者不妨
異以人事而協玄模上有清下有寧中有貞如見君子
之合撰焉夫何悖盖有道而後有天地有天地而後有
君子其身為天地所亶錫之身其民亦天地所寵佑之
民也受天地之純嘏以物身即受天地之降鑒以求民
道在而俱範於君子之裁成矣迄於今崇深猶可見也

豈有隱踰其氣數者哉如是而鬼神之與百世聖人又可類推也

於他人下筆不休處偏能渾括意盡語竭處偏能展拓以同時名作參觀自見其獨為高出也

原評

仲尼祖述堯舜

一章

金居敬

原聖德而至於天地因極贊天地之大焉夫以堯舜文武為一人而天地且弗能違也不言天地之大而何以見聖人之大乎且夫聖人者與天地合其德而成位乎中者也前之聖人身為帝王而立其極後之聖人身承帝王而集其成故夫聖人體天地之撰而天地未易擬諸其形容也大矣哉自有天地以來聖人有作未有如仲尼者也以言乎遠莫大於堯舜而仲尼以祖述者宗

其道矣危微之旨繹以克復也精一之傳闡以博約也
以言乎近莫大於文武而仲尼以憲章者守其法矣從
先進猶之乎監夏殷也脩春秋猶之乎丕顯承也而豈
但已哉吾由其所以兼綜帝王者而得其所以同流天
地上焉而動而不息者非天時乎仲尼以乾惕者律之
與偕行也下焉而靜而有常者非水土乎仲尼以安貞
者襲之應無疆也大哉仲尼內以藏諸用外以顯諸仁
立其本以為翕受之原及於末以著敷施之績如地之

無不載也如天之無不覆也變通配四時陰陽之義配日月也堯舜文武所以財成輔相參贊化育各極其盛者萃於一人矣仲尼之大一天地也而天地何如其大乎天高地下萬物散殊固並育於其間也動植者自如飛潛者自若不相害也寒往則暑來日往則月來其道並行也推遷而成歲繼禪而生明不相悖也而其所以不害不悖者何哉天地之小德也無極而太極二氣而五行於是焉而至於不可紀而莫能名也殆於如川之

流者矣而其所以並育並行者何哉天地之大德也自不可紀而莫能名反而之於五行凝於二氣太極歸根於無極也必有敦厚其化者矣天呈象而地成形各給者不匱於挹注乾知易而坤能簡握要者不歧於統歸天地之大如此而吾所以取譬之意復何待言哉

鑄局運意全在前半篇後則湘轉帆隨風利不得泊矣

仲尼祖述堯舜

一節

張英墨

中庸歸道統於聖人而舉其備道之全功焉夫仲尼之學合古今上下而立隆者也不可推為備道之一人哉中庸歷言天道人道至此將以明所統也若曰道在天下固無往而不寓矣若夫綜其成以為功者則不得不推立極之一人蓋廣言之為至誠天地虛擬之為聖人君子皆可以仲尼之一身備之道非自仲尼而始必有其創垂者故仲尼之學不可窺所可窺者在帝王相傳

之要道惟賴仲尼而立尤必有其範圍者故仲尼之學
不可見所可見者在高深協贊之中由今思之道統開
於堯舜所以立百代之宗也仲尼則祖述之精一之微
言以數聖人咨儆於一堂而猶懼其晦以一聖人相感
於曠代而如見其心非得統之獨尊者與觀刪書斷自
唐虞而知淵源有自來蓋不啻高曾奉之矣道法盛於
文武所以集百王之成也仲尼則憲章之制作之燦然
以數聖人釐定於前而再傳或失其遺意以一聖人修

明於後而奕禩共凜其典章非為法之大備者與觀禮
樂遵乎昭代而知精微有默喻蓋不啻章程凜之矣道
有自然之運莫著於天時仲尼則上有以律之蓋法天
行之健也在天時之流行為用而不勞之化在聖心之廣
運為出而不匱之藏夫豈有心以律之哉時中之妙有
行所無事而曲中者誠不俟仰觀而則效也已道有一
定之宜莫著於水土仲尼則下有以襲之蓋因地德之
厚也在水土之流峙亙古今而不易其常在聖心之凝

固歷常變而不渝其守夫豈有心以襲之哉安敦之性
有各止其所而至善者又無煩俯察而因應也已若此
者道在一人而遡之古帝以正其傳考之今王以觀其
備仲尼所以曠古今而立隆抑道在一身而崇而效之
與於穆同其功卑而法之與莫麗同其體仲尼所以等
崇卑而合撰更將何以擬之乎亦擬之天地而已

格正理醇神完法密洗去浮華獨標清韻

原評

唯天下至聖

一節

汪份

至聖之有臨惟其德無不備也蓋以生知之質而備四德之全則臨天下之事豈尚有所不足乎且人心莫不有知以載仁義禮智之性而心之知不能有通而無塞性之德不能驟復而皆全者其常也若夫天生一人以為天下所托命則其得於天而成於性者有不可以常理測者矣何者天下重器帝王大統勢力不可強干則理必求其可稱而屯蒙待以並濟則事必有以相成唯

天下至聖惟能聽無不聞明無不見而凡有耳目者皆絀焉凡有耳目者皆賴以安焉睿無不通知無不知而凡有心思者皆屈焉凡有心思者皆有所式焉以是而臨天下則天下雖大而臨之者恢恢乎其有餘地矣而豈有所不足乎哉且夫聰明睿知固非虛而無所麗者也蓋實有所涵之德焉惟獨得夫清明之體而無累於氣質之私故所性之理咸正無缺而且曲盡其條理焉凡寬裕溫柔而為仁發強剛毅而為義齊莊中正而為

禮文理密察而為智者皆聰明睿知所一一涵之者也
而足以有臨亦非意而知其然蓋實有可據之事焉雖
兼陳乎萬物之形而獨運以一心之理則特源以往而
殊塗百慮莫不各應其至分焉凡仁之盡而足以容義
之盡而足以執禮之盡而足以敬智之盡而足以別者
皆足以有臨之一一可據者也夫衆人自昧其本心之
知者無論矣即大賢以上用其知以求復其性而四端
之充或偏至而難求其備強學所致亦歷淺而未得其

深以是而入於萬事萬物之中其不足之形有更起疊出而不能自掩者矣而至聖既獨擅生知之質而無歉矣其所性之理足乎已而無待於外而又務竭其耳目心思之材學問以成其變化務盡其仁義禮智之性擬議以合於中庸如此則不必入於萬事萬物之中而無所不足之實有返觀默索而信其不爽者矣蓋仁義禮智者生知之德而容執敬別者臨天下之實事德固不可假事亦不可誣也其不足者雖強以飾之而衆不可

欺其無不足者雖無以屈之而無思不服凡所臨者皆有耳目心思以窺上之所蘊而可易言臨哉故自至聖而外臨天下者皆處於不足之數者也

將四德併入生知內合發非避難趨易理本如是也大賢以上學力亦不能造生知亦不廢學二義尤勘得至聖身分出文氣疎達老健亦見作家本領

--	--	--	--	--	--	--	--	--

舟車所至

八句

陶元淳墨

極聖德之所備盡一世而尊親之也夫天下之尊親至聖惟其德也其光被何如哉且夫托乎萬民之上而天下羣然奉之稱之曰元后分未嘗不尊也仰之曰父母情未嘗不親也而非有以廣被乎天下之無窮則雖其入之者深感之者遠而風聲所漸猶可以道里疆界求之也若至聖之聲名其施及豈有既哉彼夫六合之外贅弗能賔也譯弗能通也況以天子之精微而寧喻之

也故夫八荒之遠正朔不必加也聲教不必訖也然而天子之神靈則已震之也言乎舟車則梯航萬里其載德以行者乎言乎人力則經涉萬國其扶德以往者乎過此則為絕人之區矣而天之覆地之載有不與之俱覆俱載者乎至此則皆積氣之所矣而日月之照霜露之隊有不與之俱照俱隊者乎吾見天位乎上地位乎下萬物之含靈以出者共稟乎陽剛陰柔之德以自全其知能之體乃得陽之精而為氣得陰之精而為血心

知之乘運而覺者深感夫鼓舞變化之用而自生其愛敬之心天下之尊吾君者猶神明也乃絕俗何知非僅若風氣之異者猶可以恩信孚也而近者咸請入臣遠者亦求置吏其莫不尊者猶我封域之內也夫人主之衣冠瞻視亦有何奇而傳之四國猶凜然其震動豈其有血氣者而不神明奉之也哉天下之親我君者猶父母也乃處勢既遠非僅若嗜欲之殊者猶可以羈縻勿絕也而歲時則來獻見水土則貢百物其莫不親者猶

吾赤子之倫也夫盛世之山川草木亦復何知而德之
感被猶競獻其禎祥况乎有血氣者而不父母依之也
哉至聖聲名之盛如此

題氣直下中間更無停頓前半如題順叙極變化舞
躍之致後二股神氣相抱通篇直如一股

淡而不厭

可與入德矣

蔡世遠

即闇然日章者而申言之而入德之方為不容已矣夫
淡簡溫闇然也不厭而文且理焉則日章矣欲入德者
可不知所謹以實致其為已之功哉今夫學以立誠也
誠之至者自不可掩故敦本務實之修君子所貴然其
端甚微其功甚密身心內外之間下學之始基託焉君
子之道何以闇然而日章哉其言庸言其行庸行淡矣
而有物有恒令人味之而彌旨焉何其不厭也辭寡而

中貌質而恭簡矣而蘊德含章令人挹之而不盡焉何其文也和以處衆易以居心溫矣而稱物平施則權衡自定而條理井然焉何其理也是所謂闇然而日章者也是為己之功所馴致焉者也君子之道大率類然雖然反己之修必致審於人已相關之際務本之圖必洞悉乎本末相因之理苟其心不紛於外慕而內美中存識復極於至精而幾微畢達深究乎千里之應違在於居室而知遠之近焉外著之光輝本於宥密而知風之

自焉一心之退藏不能不大白於廣衆而知微之顯焉
自其由外之內者而言則知九經三重不外行之以一
本之於身自其由內達外者而言則知致中致和即可
天地以位萬物以育學至此已能知所謹而功有可用
德有由入矣蓋淡簡溫而不厭而文且理者是成德之
事也是為己之功之明效大驗也知遠風顯之由於近
自微者是入德之方也所以密其為己之功而審端用
力於斯乎在也又可引詩而畢其說矣

詞無枝葉語有倫次足繼美正嘉作者

上天之載

三句

徐用錫

聖德同天故於天得其至焉蓋不顯則無聲臭之可言
矣擬之天載至矣乎此闇然之極也且德之從來出乎
天而其成也亦似之此惟窺見本原之論始能會意於
思議之表而有以得其真也毛猶有倫謂之倫則亦顯
之類也謂之有則未離乎顯之跡也是皆非其德之至
者蓋志已立於人之所不見而至於主靜立極之真非
天下之至神者孰能與於斯也功已密於言動所不形

而至於神明默成之乎非天下之至化者孰能與於斯也今夫物有聲臭也已遠乎形而即乎氣又氣之至微而介乎有無之間者以此為言亦無惡其涉於迹象而間於精微矣而文王之詩所云天載者並此而無之豈不以穆清在上天本為聲臭之元而所以樞紐乎造化者天未嘗自有其聲臭也乾元資始而神存於沖漠誠之不貳者如此矣豈不以神氣風霆天本極聲臭之用而所以根柢乎品彙者天未嘗自私其聲臭也陰陽不

測而化妙於無迹命之不已者如此矣若夫不顯之德
措之為經綸發之為事業極其盛則含生負氣之倫莫
之有遺而推其功則化育流行之大亦且有助是豈聲
臭之無者乎然以云不顯則神之所凝聖不可知舉天
下之大有而悉與性體無所與純粹以精渾然與天一
其神而已化之所行遠不可禦舉天下之衆有而悉於
性分無所加不動而變廓然與天合其化而已無聲無
臭此可以云不顯之至矣要之君子之學惟為已之一

念基之蓋與於穆同運者即充其闇淡無文之心而與大化同流者即極其切近精實之務此篤恭之德所以始終不顯而天德無慕乎高遠王道不雜於功利聖神之絕軌不過為中庸之極功也子思子之意深哉

此等題一涉玄渺語便非不顯實際文根柢先儒語無虛泛最見心力之細 神化分貼本瞿浮山